

Likhomo Sechaba sa heso,

Ke ka tlhompho, thabo le monyaka o moholo ke fanang ka molaetsa ona oa Keresemese, ho lona Sechaba sa heso. Nako ena, ke ee re fihlisang pheletsong ea leeto leo re le tsamaileng ho tloha ha esale selemo se qala. Ka hona, joaloka Sechaba sa Bolumeli, ke nako eo re lokelang ho leboha Ea Matla Ohle ha e le mona a ntse a re alimile bophelo, ‘me a re baballetse hofihlela mona. Etsoe e se ka bohlale ba rona, re fihletseng tsohle tseo re nang le tsona, empa e le ka mohau oa Morena Molimo.

Ha re hopotsaneng hee, “Bana ba Thari E ntšo”, hore nako ena ke eo Morena Jesu Kreste a hlahileng ka eona, ‘me re keteka sehopotso sa tsoalo ea Hae ke hona. Re lokela ho keteka tsoalo ea Hae ka monyaka ohle le boitlhompho. Ke ka hona re lokelang hore re ikeletseng hore hase nako ea liketso tse qetellang ka ho thunthetsa thabo le monyaka oa malapa le metse ea rona kae kapa kae kahara Lesotho.
‘Me mona, kopo e khetheleng ke e tobisa ho Bacha ba na ha ena. Hopolang Bacha hore ke lona Baetapele le Sechaba sa kamoso; ipolokeng, qophellang ka nako tsohle ho etsa hantle, ka nepo.

Nako ena ea mafelo a selemo, e re fa monyetla oa ho itekola ka sepheo sa ho tiisa moo re ileng ra atleha, le ho lokisa moo re ileng ra thulana le liphephetso, e le hore ha re kena selemong se secha, re kene ka matla, ka mafolo-folo, ‘me re iphile bohlale bo bocha.

Sechaba sa Basotho se tla hopola hore, likhetho tse akaretsang tsa na ha, li ile tsa tšoaroa ka la 26 Motšeanong, selemong se holimo, ‘me khetho ea Sechaba ea re “tsoalla namane” e sebopoho sa puso e kopanetsoeng ke mekha ea lipolotiki e meraro, e leng Kobo-Tata ea Basotho (ABC), Lekhotla la Puso ea Sechaba ka Sechaba (LCD) le mokha oa Sechaba Sa Basotho (BNP). Ke khoeli tse isang botšeleteng joale ‘Muso ona oa kopanelo o le litulong.

Hoa tsebahala hore ‘Muso ona oa Kopanelo o kene pusong Lesotho le tjametsoe ke liphepetso tse ‘maloa, hara tsona re ka bua ka tlala le bofuma, tlhokahalo ea mesebetsi, lefu la HIV le AIDS, hammoho le maemo a komello e bakoang ke phetoho ea boemo ba leholimo (climate change).

Le ha hole joalo, ‘Muso ha o'a ka oa lula feela o hobotse mahlo, o phuthile matsoho, o “lla sa ‘mokotsane”! Hang ka morá ho hlomamisoa ka khoeli ea Phuptjane, ‘Muso oa Motlotlehi o ile oa itahlela

ka setotsoana, oa kenya mohoma temeng ho loantsa liphephetso tsena tseo ke sa tsoa li lokolisa.

Sechaba se tla hopola hore 'Muso o ile oa ipha matsatsi a lekholo o kene pusong hore o tlalehe seo o li fihletseng. Re ile ra etsa tlaleho eo joaloka ha re ne re ile ra itlama. Ka hona, e le ho se "ebise" Sechaba litsebe, ka boikokobetso ke kopa hore ke se phete "lifela" tseo tsa tsebetso ea 'Muso ho fihlela mona moo re le leng teng, kutloisiso e mpe ebe hore tlaleho eo ea matsatsi a lekholo, e entse motheo oo joale re fetang ka ona ho ea pele.

Ke tla lokolisa likatleho tse peli kapa tse tharo feela, 'me ke tla boela ke kopa kutloisiso ea Sechaba hore, le ka moso, "Molaetsa oa Tona-Kholo oa Keresemese", o se lokolise lintlha tsohle tseo 'Muso le Sechaba ba utloisisang hore ke likatleho, ehle ebe "Molaetsa oa Keresemese". Etsoe re lebelletse hore, ka puso e nang le ponaletso, hang ha selemo sa lichelete se kolumela, 'muso a tlalehela Sechaba ka likatleho tseo o li fihletseng, ekasitana le moo o khibetseng.

'Nete e molemo kamehla ebole e ea tlama naheng ea bakreste.

Ha ke etsa mehlala ea likatleho tsa rona re le 'Muso, ke motlotlo ho supa khotso le botsitso tse renang ka hara naha. Khotso le botsitso ke tsona litshetso tse kholo tseo kholiso ea moruo, ntlafatso ea naha esita le bophelo ba batho li itsetlehang ka tsona.

Re lokela ke hona ho leboha ka mokhoa o khetheleng, Mafapha ohle a sebetsanang le poloko ea khotso, boiketlo ba Sechaba le toantsa ea botlokotsebe. Re lokela ho fihlela boemo, re le naha, ba khotso, botsitso le phelisano e ntle. Sechaba ka moka se lule se itsamaela ka bolokolohi, maqhekoana, basali le bana ba banana ba khaotse ho hlorisoa ka ho betoa,' me leruo la liphooftlo la monna kapa mosali oa Mosotho le lule le tsireletsehile.

Ho fihlela tsena, re lokela ho sebetsa ka thata ho tiisa maqhama a tsireletso ka makala a amehang, ekasitana le ho hlahloba melao e laolang likotlo tsa ba ikemiselitseng ho tuma ka bosenyi.

Komello e bakoang ke phethoho ea boemo ba leholimo e ile ea tsoelapele, 'me hara tse ling, ea ama temo.

Kamor'a hore 'Muso oa Kopanelo o kene pusong, o ile oa fumana hore lichelete tse neng li reretsoe ho thusa temong ke 'Muso o fetileng, li fokola haholo, eaba 'Muso o eketsa lichelete tseo ka sepheo sa ho khahlanyetsa lihoai ele ho atisa lijo esita le hona ho kena ka sekhhahla temong ea lijalo tsa lehlabula.

Chelete e ileng ea fuoa lekala la Temo le Kanetso ea Lijo e bile limillione tse lekholo le leshome le metso e supileng tsa maloti. Lichelete tseo li ntse li sebetsa temong.

Sechaba sa habo rona ke se seng se hlasetsoeng ke lefu la HIV le AIDS haholo.

HIV le AIDS e ntse e le tlokotsi e kholo ka hare ho naha, e tobileng, haholo-holo bacha ba rona. Leha ho le joalo, katleho e bonahala ele teng toantsong ea lefu lena. Palo ea batho ba fumanang li litlhlare tsa anti-retroviral li eketsehile, sekhahla sa ho phahama hoa tšoaetso ea HIV le AIDS se bonahala se emisitse ho nyoloha, ‘me ’Muso o lutse o falimehile ka mehla ntoeng ea ho leka ho fanya kholumo-lumo ena.

Re tla hopola hore seterekeng sa Mafeteng ho ne ho se na khotso lipakeng tsa libini tsa ’Mino oa Famo. ’Muso oa Motlotlehi o ile oa kena lipakeng ho bopa khotso lipakeng tsa mahlakore a neng a sa utloane.

Kajeno leseli le hlahile, ‘me khotso e teng. Ho bohle ba kentseng letsoho tabeng ena, marena, likereke, libini, le batšehtesi ba tsona, rea leboha. ’Muso o ntse o tsoelapele ho hlabolla ba ileng ha angoa ke liketsahalo tsena.

Ntšetsopele ea Sechaba ke taba ea bohlokoa. Ke ka hona ’Muso oa Motlotlehi o ileng oa fetola Lekalana le neng ele la Boiketlo ba Sechaba hore ebe Lekala le ikemetseng, le seng le bitsoa Lekala la Ntšetsopele ea Sechaba (Ministry of Social Development).

Leihlo la rona litabeng tsena re tla le lahlela haholo sechabeng se ka maloting moo lits'ebeletso li fokolang haholo ka mafapha a fapakaneng a ’Muso.

’Muso oa Motlotlehi o atlehile ho fetisa tokomane ea Leano la Moralo oa Ntšetsopele ea Naha 2012/13 – 2016/17 (National Strategic Development Plan 2012/13 – 2016/17).

Ke tokomane e tlang ho re tataisa ho fanya liphephetso tsohle tseo ke buileng ka tsona sethathong.

Sechaba sa heso, ha ke buile hakana, ntumelleng ke akaretse ka hore, ’Muso ka Makala a oona ka ho fapakana, o tšoere ka thata tšebetsong, ka

sepheo sa hore naha ea rona e phahame moruong, sechaba se tsebe ho atleha ho iphelisa ka boiketlo.

Ke ile ka kopa hore molaetsa oa Keresemese e be molaetsa oa Keresemese. Ka hona Basotho ba batle, ntumelleng ke le lakaletse Keresemese e monate, e mofuthu, lona le malapa a lona. Ha ebe nako ea ho phomola, ea ho ?kha moea o mocha, ea ho itlhatlhoba, ka sepheo sa ho siea tse mpe morao, re feteng le tse ntle.

Nako ea Keresemese hantle ke nako eo re lokelang ho rapela ka ho fetisia, esita le hona ho leboha Ea Matla Ohle, ha a re file monyetla oa hoba ka koano ho lebitla. Ha re ketekeng letsatsi la tsoalo ea Morena oa Rona Jesu Kreste ka tlhompho le menate eohle. Re ipaballeng, re bone hore bophelo ba rona bo lula bo bolokehile.

Ha re hopoleng bohole Baratua ba rona ba ileng ba falla lefatšeng le ka koano, re ntse re leboha Morena Molimo ka bophelo boo a ileng a bo fa Baratua bao ba rona.

Lebitsong la lona, sechaba sa heso, ke nka monyetla ona ho lakaletsa Motlotlehi Letsie la Boraro, Motlotlehi Mofumahali le Lelapa lohle la Botlotlehi Keresemese e monate le mahlohonolo a Selemo se secha.

Khotso, Pula, Nala

.....
.....
.....
.....